

Morning Dogri (NSD) National News Bulletin 06-12-2024

आकाशवाणी

- प्रधानमंत्री नरेन्द्र मोदी होर अज्ज अष्टलक्ष्मी महोत्सव दा उद्घाटन करडन जेहदा मकसद पूर्वोत्तर दी समृद्ध संस्कृति ते दस्तकारिएं दा जशन मनाना ऐ।
- केंद्र सरकार ते एशियाई विकास बैंक नै मेघालय च जलवायु दे अनुकूल पानी दे संग्रहण आहली परियोजना लेई 5 करोड डॉलरें दे दोआर समझौते पर दस्तख्त कीते न।
- भारती रिजर्व बैंक – आरबीआई अज्ज अपनी द'ऊं-द'ऊ म्हीनें आहली मौद्रिक नीति दे बारै च लैते गेदे फैसले दा ऐलान करोग।
- क्रिकेट च, अज्ज शारजाह च मर्दे दे अंडर-19 एशिया कप टूर्नामेंट दे सेमीफाईनल च अज्ज भारत दा मुकाबला श्रीलंका कन्नै होग।
- टेस्ट क्रिकेट च भारत ते अस्ट्रेलिया बश्कार बार्डर गवास्कर श्रृंखला दा दुआ टेस्ट मैच अज्जै थमां शुरु होआ करदा ऐ।

<><><><><><>

PM

प्रधानमंत्री नरेन्द्र मोदी होर अज्ज भारत मंडपम नमीं दिल्ली च अष्ट लक्ष्मी महोत्सव दा उद्घाटन करगंन। त्रऊं रोजा इस उत्सव च पूर्वोत्तर दा सांस्कृतिक, समाजिक ते आर्थिक ताना बाना प्रदर्शन कीता जाग। महोत्सव सब्बने 8एं राज्यें दी संस्कृति, कपड़ा उद्योग, हथखण्डी ते पर्यटन दे इलावा उत्थूं दे शानदार उत्पादें लेई इक मंच प्रदान करोग। इस दरान 250 शा मते शिल्पकार, 34 जीआई टैग आलिएं चीजें सनें बेजोड दस्कारी ते कृषि बागवानी उत्पादें दा प्रदर्शन करगंन। इस कार्यक्रम च इक फैशन शो, डिजाइन कनक्लेव ते क्रेता-विक्रेता सम्मेलन बी आयोजित कीते जांगन।, जेहडे सार्थक सैह्योग प्रदान करने दे कन्नो कन्नी आर्थिक तौरा उप्पर त्रभावकारी सिद्ध होंगन।

<><><><><><>

ADB

केंद्र सरकार ते एशियाई विकास बँक –एडीबी नै मेघालय च जलवायु दे अनुकूल पानी दे संग्रहण आहली परियोजना लेई 5 करोड डॉलरें दे दोआर समझौते पर दस्तख्त कीते न। आर्थिक मामलें सरबंधी विभाग च संयुक्त सचिव जूही मुखर्जी ते एडीबी दे भारती मिशन दे कंट्री डायरेक्टर मियो ओका होरें कल जलवायु-अनुकूल समुदाय-आधारित जल-संग्रहण परियोजना लेई दोआर समझौते पर दस्तख्त कीते। एह परियोजना 12एं जिलें च 532 लौहकी जल-भंडारण सुविधाएं दे निर्माण च मदाद करोग। एह सुविधां भारी बरखा ते चानचक्क औने आहले हाड़ गी नियंत्रित करने लेई जलवायु-अनुकूल डिजाइन तैयार करडन। इस परियोजना दे तैह्त करसानें लेई 3 जहार हेक्टेयर कमांड इलाका विकसित कीता जाहग। एहदे अलावा गारो, जैतिया ते खासी इलाकें च जलवायु डेटा किट्ठा करने ते निगरानी करने लेई 50 मौसम केंद्र ते सूक्ष्म सिंचाई प्रणाली बी स्थापित करोग। एशियाई विकास बँक मेघालय राज्य जलग्रहण ते बंजर भूमि विकास एजेंसी ते मिट्टी ते पानी दे संरक्षण सरबंधी विभाग दी जल प्रबंधन समर्थ गी मजबूत करने च मदाद करोग।



RBI

भारती रिजर्व बँक – आरबीआई अज्ज अपनी द'ऊं-द'ऊ म्हीनें आहली मौद्रिक नीति दे बारै च लैते गेदे फ़ैसलें दा ऐलान करोग। आरबीआई गवर्नर शक्तिकांत दास हुंदा अध्यक्षता च खडेरी गेदी समिति, मौद्रिक नीति पर जंदे बुधवार थमां विचार-बटांदरा करै करदी ही। माहिरें-विशेषज्ञें दा मन्नना ऐ जे रिजर्व बँक आसेआ रेपो दर पर पैहले आहली स्थिति बरकरार रक्खने जाने दी मेद ऐ, पर नगद आरक्षी अनुपात-सीआरआर गी समायोजित करने पर विचार करी सकदा ऐ। रिजर्व बँक नै फरवरी 2023 थमां रेपो दर जां लौहकी अवधि आहले दोआर दी दर गी 6 इशारिया 5 फीसद पर गै बरकरार रक्खे दा ऐ। सीआरआर च कटौती करी बैंकिंग प्रणाली च तरलता आई सकदी ऐ, जेहदे'नै आर्थिक गतिविधियें च बाददे दी मेद ऐ। मई 2022 थमां जारी 4 इशारिया 5 फीसद सीआरआर च बी कोई बदलाव नेई कीता गेआ ऐ।



India China Border

भारत ते चीन नै दौनें सरकारें बश्कार प्रासंगिक दपक्खी समझौते, नियमें ते सैह्मति मूजब असरदार ढंगै सिर बन्ने दे प्रबंधन ते रमानदारी बनाई रखने दी जरूरतै पर सैह्मति जताई ऐ। भारत ते चीन दे बन्ने आहले मामलें पर सलाह-सूत्तर ते तालमेल लेई कार्य तंत्रएमसीसी दी 32मी बैठक कल नमीं दिल्ली च आयोजित कीती गई। भारती डेलीगेशन दी अगुवाई विदेश मंत्रालय च पूर्वी एशिया सरबंधी संयुक्त सचिव – गौरांगलाल दास ते चीन विदेश मंत्रालय दे बन्ने ते महासागरे सरबंधी मामलें दे विभाग दे महानिदेशक हांग लियांग होरे चीन दी अगुवाई कीती। दौनें घडे बन्ने आहले खेत्तरे दी स्थिति दी समीक्षा कीती ते बरे 2020 दिएं घटनाएं थमां सिक्खे गोदे सबक पर विचार कीता तांजे परतियै इस किस्मै दिआं घटना नेई होन। इस सरबंधै च, उनें स्थापित तंत्रे दे राहें कूटनीतिक ते फौजी स्तरै पर नियमित आदान-प्रदान ते संपर्क दे महत्व पर जोर दित्ता।



Ambedkar

बाबा साहेब डॉ. भीमराव अम्बेडकर हुंदे 69मां परिनिर्माण दिवस उप्पर अज्ज कृतज्ञ राष्ट्र उनेंगी श्रद्धांजलि अर्पित करा'रदा ऐ। भारतीय संविधान दे शिल्पी डॉ. अम्बेडकर हुंदे महा परिनिर्माण दिवस उप्पर राष्ट्र निर्माण च उंदे योगदान लेई देश च केई कार्यक्रम आयोजित कीते जा'रदे न। उपराष्ट्रपति जगदीप धनखड़, प्रधानमंत्री नरेन्द्र मोदी, लोक सभा अध्यक्ष ओम बिरला, राज्य सभा दे उप-सभापति हरिवंश ते जहोर दुए सांसद ते प्रमुख नेता नमीं दिल्ली च संसद भवन परिसर स्थित उप्पर चंदी प्रतिमा उप्पर पुष्पांजलि अर्पित करगंन। भारत रत्न डॉ. अम्बेडकर इक न्यायविउ, विचारक, अर्थशास्त्री ते समाज सुधारक हे, जिनें अपना जीवन समानता दी वकालत करने ते जाति अघारत भेदभाव गी खत्म करने लेई समर्पत करी दित्ता। बाबा साहेब होरे गी 1990 च भारीत रत्न कन्नै सम्मानत कीता गेआ हा। महाराष्ट्र च बाबा साहेब हुंदी समाधि चौर्य भूमि उप्पर अज्ज बडे मते लोकें दे पुज्जने दी मेद ऐ जेहदे चलदे प्रशासन आस्सेआ सब्बै प्रबंध करी लैते गेदे न।



RNU Raising Day

आकाशवाणी दा क्षेत्रीय समाचार एकांश जम्मू अज्ज अपना 54मां स्थापना दिवस मनाऽ करदा ऐ। इस सिलसिले च एकांश आसेआ अज्ज केई सारे कार्यक्रम करोआए जा करदे न जिंदे च हूनै शा किश चिरै मगरा ठीक साङ्गे 9 बजे, 30एं मिंटे दा इक विशेष कार्यक्रम दा प्रसारण शामिल ऐ। एह्दे अलावा अज्ज संझा 7 बजे बी 15एं मिंटे दा इक विशेष कार्यक्रम प्रसारत कीता जाहग। अपने कर्मिं दी हौसला-अफजाई लेई, ऐकती स्थापना दिवस दे मौके पर इक सम्मान कार्यक्रम दा सरिस्ता बी कीता जा'रदा ऐ जेह्दे च 2024 ब'रे दे बेह्तरीन समाचार सम्पादक, डोगरी ते गोजरी दे बेह्तरीन समाचार वाचक ते अनुवादक, बेह्तरीन जिला संवाददाता ते जनरल स्टाफ श्रेणी च बेह्तरीन कर्मी दे सम्मान भेंट कीते जाडन। 2024 आले लोकसभा ते विधानसभा चुनाएं दरान आकाशवाणी दे विशेष कार्यक्रमें लेई टकोह्दा जोगदान देने आह्लें गी बी अज्ज सम्मानित कीता जाहग।



Earthquake

अमरीका दे उत्तरी कैलिफोर्निया च भूंचाल दे तेज झटके मसूस कीते गे। रियक्टर स्केल उप्पर भूंचाल दी तीव्रता 7 मापी गई। एह्दे चलदे सुनामी दी चेतावनी बी जारी कीती गई। भूंचाल दे तेज झटके मगरा कैलीफोर्निया दे 53 लक्ख लोकें लेई सुनामी दी चेतावनी दिक्ती गई ऐ। उआं भूंचाल च कुसा जानमाल दे नुकसान दी कोई खबर नेई ऐ।



Cricket

शारजाह च खेड्डे जा'रदे अंडर-19 एशिया कप मकाबले दे सैमीफाइनल च अज्ज भारत ते श्रीलंका बश्कार मैच खेड्डेआ जाग। मैच भारतीय समें मताबक बडलै साढे 10 बजे थमां शुरू होग। इक दुए मैच च अज्ज दुबई च पाकिस्तान ते बंग्लादेश बश्कार बी मकाबला होग। भारत मे मेजबान यूएई



India

भारत ते आस्ट्रेलिया बश्कार बार्डर गवास्कर ट्रॉफी दा दूआ क्रिकेट टैस्ट मैच अज्ज थमां एडीलेड ओवल च खेड्डेआ जाग। मैच बडलै साढे 9 बजे शुरू होग। एह मैच दिन-रातीं दा होग ते एह गुलाबी रंग दी गेद कन्नै खेड्डेआ जाग। पर्थ च खेड्डे गेदे पैहले मैच च भारत नै शानदार जित्त दर्ज कीती ही। इस जित्त दे कन्नै भारत आईसीसी विश्व टैस्ट चैंपियनशिप दी अंक तालिका च पैहली थाहर उप्पर पुज्जी गेआ ऐ। अगले ब'रे जून च लाडर्स मैदान उप्पर खेड्डे जाने आले विश्व टैस्ट चैंपियनशिप फाइनल लेई अजे बी 5 टीमां मैदान च न। भारत गी फाइनल च थाहरी बनाने लेई बार्डर गवास्कर ट्रॉफी श्रृंखला च आस्ट्रेलिया गी हराना होग।

